



**POLISI
KONFLIK
KEPENTINGAN**

**KEMENTERIAN
DALAM NEGERI**

KATA ALUAN

KETUA SETIAUSAHA KEMENTERIAN DALAM NEGERI



بِسْمِ اللَّهِ الرَّحْمَنِ الرَّحِيمِ

Assalamualaikum warahmatullahi wabarakatuh dan Salam Sejahtera,

Terlebih dahulu saya memanjatkan kesyukuran kerana atas limpah kurnia serta keizinanNya, Kementerian Dalam Negeri (KDN) telah berjaya menerbitkan naskah **Polisi Konflik Kepentingan Kementerian Dalam Negeri**. Ini merupakan salah satu usaha KDN ke arah memperkukuhkan dan membudayakan perkhidmatan yang berintegriti di kalangan warga kerjanya.

Konflik kepentingan adalah perkara yang lazim berlaku dalam sesuatu organisasi di mana sebagai penyampai perkhidmatan, kita tidak boleh lari dengan urusan yang melibatkan aktiviti, transaksi dan projek yang berhubungan dengan pihak ketiga, sama ada secara *one-off* atau berterusan. Oleh itu, polisi ini dibentuk supaya dapat memberikan panduan kepada semua warga KDN serta pihak ketiga yang berurusan dengan KDN, mengenai prinsip dan tatacara yang perlu dilaksanakan bagi memastikan tidak berlaku apa-apa percanggahan kepentingan dalam tugas rasmi seharian.

Saya menyeru agar Polisi Konflik Kepentingan KDN ini dihayati, dipatuhi serta dijadikan sebagai panduan oleh semua warga KDN agar perlakuan rasuah dan pelanggaran integriti dapat dielakkan demi memastikan pegangan KDN iaitu 'Tiada Toleransi Terhadap Rasuah' dapat diamalkan.

Sekian.

A handwritten signature in black ink, which appears to read 'Wahlan', written over a horizontal line.

Dato' Sri Wan Ahmad Dahlan bin Haji Abdul Aziz

Ketua Setiausaha Kementerian Dalam Negeri

Tarikh : 03 November 2022

KANDUNGAN

1. Tujuan	4
2. Takrifan	4
3. Pernyataan Polisi Konflik Kepentingan	5
4. Pengisytiharan Kepentingan	6
5. Pemakaian	6
6. Pelanggaran Polisi	6
7. Pertanyaan dan Pelaporan	7
8. Tarikh Kuat Kuasa	7
9. Penutup	7
10. Aku Janji Polisi Konflik Kepentingan KDN	8
11. Rujukan	9

1. TUJUAN

- 1.1 Polisi Konflik Kepentingan Kementerian Dalam Negeri (KDN) merupakan satu panduan kepada semua warga KDN untuk menerangkan prinsip, peraturan dan isu berkaitan dengan konflik kepentingan yang timbul semasa menjalankan tugas rasmi demi memastikan warga KDN menjalankan tugas dengan telus, adil dan berintegriti.

2. TAKRIFAN

Konflik Kepentingan

Apa-apa tingkah laku atau cara yang boleh menyebabkan pegawai telah membiarkan kepentingan peribadi bercanggah dengan kepentingan awam; atau menggunakan kedudukan awamnya bagi faedahnya sendiri, saudara atau sekutu.

Warga KDN

Pegawai dan kakitangan yang berkhidmat di KDN sama ada melalui lantikan tetap, sementara, sangkut, pinjaman, kontrak atau sambilan termasuk lantikan politik.

Anggota Pentadbiran

Merujuk kepada tafsiran di bawah “Anggota pentadbiran” di bawah Fasal (2) Perkara 160 Perlembagaan Persekutuan.

Saudara dan sekutu

Merujuk kepada tafsiran “saudara” dan “sekutu” di bawah Seksyen 3, Akta Suruhanjaya Pencegahan Rasuah Malaysia 2009 [Akta 694].

Pihak Ketiga

Kontraktor, vendor, pembekal, organisasi, persatuan, individu atau mana-mana pihak yang berurusan dengan KDN.

Rasuah

Rasuah dalam konteks Akta Suruhanjaya Pencegahan Rasuah Malaysia 2009 [Akta 694] membawa maksud memberi atau menawarkan, menerima atau meminta atau setuju untuk menerima atau meminta suapan secara langsung atau tidak langsung sebagai dorongan atau upah untuk melakukan atau tidak melakukan perbuatan yang berkaitan dengan tugas rasmi.

3. PERNYATAAN POLISI KONFLIK KEPENTINGAN

Setiap warga KDN dilarang:

- 3.1 Mengadakan hubungan secara langsung atau tidak langsung dengan mana-mana pihak ketiga untuk kepentingan peribadi yang boleh menimbulkan percanggahan dengan tugas rasminya.
- 3.2 Membiarkan diri atau saudara/sekutu berkelakuan dengan cara yang mungkin menyebabkan kepentingan peribadinya bercanggah dengan kepentingan tugas rasmi.
- 3.3 Terlibat dalam membuat keputusan atau urusan perolehan atas kapasiti tugas rasmi dengan mana-mana pihak yang mana saudaranya atau sekutunya memiliki kepentingan dalam pihak tersebut.
- 3.4 Menyalahgunakan kedudukan rasmi untuk mempengaruhi keputusan yang memihak kepada dirinya atau saudara/sekutunya.
- 3.5 Menyalahgunakan kedudukan rasmi sebagai warga KDN untuk mendapat layanan istimewa atau keuntungan daripada mana-mana pihak ketiga.
- 3.6 Menyalurkan apa-apa maklumat terperingkat berkaitan KDN yang membolehkan pihak ketiga mendapat manfaat dalam apa-apa urusan rasmi di KDN.

4. PENGISYTIHARAN KEPENTINGAN

- 4.1 Warga KDN yang mempunyai konflik kepentingan dalam mana-mana proses kerja hendaklah mengisytiharkan kepentingannya kepada Ketua Jabatan.
- 4.2 Ketua Jabatan hendaklah menggantikan mana-mana warga KDN yang telah mengisytiharkan kepentingannya dengan pegawai yang tidak mempunyai kepentingan dalam proses kerja tersebut.
- 4.3 Warga KDN yang mempunyai konflik kepentingan dan terlibat membuat keputusan dalam mana-mana mesyuarat atau panel (contoh temu duga), hendaklah mengisytiharkan kepentingannya kepada mesyuarat/panel serta meninggalkan mesyuarat/panel tersebut. Urus setia kemudiannya hendaklah merekodkan pengisytiharan kepentingan pegawai dan tindakan pegawai meninggalkan mesyuarat/panel.

5. PEMAKAIAN

Polisi ini terpakai kepada semua warga KDN. Polisi ini juga hendaklah dijadikan panduan oleh pemegang taruh, rakan strategik atau pihak ketiga KDN.

6. PELANGGARAN POLISI

Mana-mana warga KDN yang didapati gagal untuk mematuhi polisi ini boleh disifatkan sebagai ingkar perintah dan diambil tindakan di bawah Peraturan-Peraturan Pegawai Awam (Kelakuan dan Tatatertib) 1993. Pelanggaran polisi oleh pihak ketiga akan dilaporkan kepada Suruhanjaya Pencegahan Rasuah Malaysia, Kementerian Kewangan, Suruhanjaya Syarikat Malaysia, atau mana-mana badan pengawal lain yang berkaitan.

7. PERTANYAAN DAN PELAPORAN

Sebarang pertanyaan atau pelaporan mengenai pelanggaran polisi ini boleh dikemukakan melalui saluran seperti berikut:

(i) **Sistem Aduan Integriti KDN** iaitu <https://online.moha.gov.my/integriti/public/formaduan.php>; atau

(ii) **Menghadirkan diri** di Pejabat Unit Integriti KDN atau menulis surat ke alamat:

**Ketua Setiausaha
Kementerian Dalam Negeri
Aras 6, Blok D9, Kompleks D
Pusat Pentadbiran Kerajaan Persekutuan
62546 Putrajaya
(u.p. : Ketua Unit Integriti); atau**

(iii) **Melalui telefon di talian 03-8885 2845 (Seksyen Pengurusan Aduan, UI KDN).**

8. TARIKH KUAT KUASA

Polisi Konflik Kepentingan KDN ini berkuatkuasa mulai tarikh ia ditandatangani oleh Ketua Setiausaha KDN.

9. PENUTUP

Dengan wujudnya Polisi Konflik Kepentingan ini, warga KDN diharap dapat memahami berkaitan prinsip dan tatacara dalam menjalankan tugas supaya dapat mengelak daripada berlakunya konflik kepentingan, seterusnya dapat menutup ruang dan peluang perlakuan rasuah. Pematuhan terhadap polisi ini akan menjadi pemangkin kepada usaha KDN ke arah membanteras perlakuan rasuah kepada segenap lapis pentadbiran.

10. AKU JANJI POLISI KONFLIK KEPENTINGAN KDN

AKU JANJI KONFLIK KEPENTINGAN KDN

Kepada Ketua Setiausaha Kementerian Dalam Negeri (KDN):

1. Saya
No. KP..... dengan ini mengaku bahawa saya tidak mempunyai apa-apa konflik kepentingan yang melibatkan saudara dan sekutu (merujuk kepada tafsiran dalam Akta Suruhanjaya Pencegahan Rasuah Malaysia 2009 – Akta 694) semasa menjalankan tugas rasmi di KDN.
2. Saya juga berjanji bahawa sekiranya saya mempunyai konflik kepentingan dalam mana-mana tugas rasmi, saya hendaklah mengisytiharkan kepentingan tersebut secara bertulis kepada Ketua Jabatan dan menarik diri daripada terlibat dalam urusan rasmi berkenaan.
3. Saya akur sekiranya mengingkari janji ini atau didapati telah memberikan maklumat palsu untuk menutup kepentingan semasa menjalankan tugas rasmi, saya boleh dikenakan tindakan tatatertib mengikut Peraturan-Peraturan Pegawai Awam (Kelakuan Dan Tatatertib) 1993.

Tandatangan Pegawai :

Nama :

Jawatan :

Tempat Bertugas :

Tarikh :

11. RUJUKAN

1. Perlembagaan Persekutuan
2. Akta Suruhanjaya Pencegahan Rasuah Malaysia 2009 [Akta 694]
3. Peraturan-Peraturan Pegawai Awam (Kelakuan dan Tatatertib) 1993
4. Kod Etika Kementerian Dalam Negeri